

58-bob. Chet ellik boshqa shaxslar uchun bojxona imtiyozlari

400-modda. Chet davlatlarning diplomatik va konsullik kuryerlari uchun bojxona imtiyozlari

Chet davlatlarning diplomatik va konsullik kuryerlari o'z shaxsiy foydalanishi uchun mo'ljallangan tovarlarni o'zaro kelishuv asosida bojxona ko'rigidan o'tkazishdan va bojxona to'lovlari to'lanishidan ozod etilgan holda bojxona hududiga olib kirishi va ushbu hududdan olib chiqishi mumkin, bundan tovarlarni saqlaganlik, belgilangan joylardan tashqarida yoki bojxona organlarining belgilangan ish vaqtidan tashqari vaqtda tovarlarning bojxona rasmiylashtiruvini o'tkazganlik uchun bojxona yig'implari mustasno.

401-modda. Chet davlatlarning vakillari va delegatsiyalari a'zolari uchun bojxona imtiyozlari

Davlatlararo muzokaralarda, xalqaro konferensiyalar va kengashlarda qatnashish uchun yoki boshqa rasmiy topshiriqlar bilan O'zbekiston Respublikasiga kelayotgan chet davlat vakillariga, parlament va hukumat delegatsiyalari a'zolariga, shuningdek o'zaro kelishuv asosida chet davlat delegatsiyalarining a'zolariga chet davlat diplomatik vakolatxonasining diplomatik agentlari uchun ushbu bo'limda nazarda tutilgan bojxona imtiyozlari beriladi. Xuddi shunday imtiyozlar mazkur shaxslarga hamroh bo'lib kelgan oila a'zolariga ham beriladi.

402-modda. Bojxona hududi orqali tranzit tarzida o'tadigan diplomatik agentlar, konsullik mansabdor shaxslari, chet davlatlarning vakillari va delegatsiya a'zolari uchun bojxona imtiyozlari

Chet davlatning diplomatik agentlariga va konsullik mansabdor shaxslariga, ularning oila a'zolariga, shuningdek ushbu Kodeksning 401-moddasida ko'rsatilgan shaxslarga bojxona hududidan tranzit tarzida o'tayotganda chet davlatlar diplomatik vakolatxonalarining diplomatik agentlari uchun nazarda tutilgan bojxona imtiyozlari beriladi.

403-modda. Xalqaro hukumatlararo va hukumatga qarashli bo'lmagan tashkilotlar, ular huzuridagi chet davlatlar vakolatxonalari, shuningdek ularning xodimlari uchun bojxona imtiyozlari

Xalqaro hukumatlararo va hukumatga qarashli bo'lmagan tashkilotlar, ular huzuridagi chet davlatlar vakolatxonalari, shuningdek ushbu tashkilotlar hamda vakolatxonalarning xodimlari va ularning oila a'zolari uchun bojxona imtiyozlari O'zbekiston Respublikasining xalqaro shartnomalarida belgilanadi.